

四庫全書

集部

欽定四庫全書

東里續集卷二十九

明 楊士奇 撰

墓表

奉議大夫尚寶司卿張君墓表

正統七年二月三日尚寶司卿張信彥實卒於官張氏
世居山東掖縣之進士鄉其祖若父皆以行稱於鄉祖
曰二父曰五母于氏見余所作墓銘父母三子彥實其
季也孝友出於天性自幼雖饑渴食飲不先父母父喪

哀毀母病數更醫不效益困聞人肉可療久疾即自剖
煮液進之遂瘡永樂初鄉里上其行有司以達於朝下
御史驗之信詔旌其門命為尚寶司丞授承直郎進承
德郎居家事二兄如父壯老賤貴一致居官治職務勤
慎處同寮有善能讓有過舉率自引咎其度有容同寮
或造誣毀之或挾勢陵之一不校如罔聞然遇行不當
理必據義執辭不以出位為嫌前尚寶卿朱琇輩行尊
且有寵於上亦嚴憚彥實然心恒德其忠於已九載陞

尚寶少卿階奉訓大夫進奉直大夫侍仁廟監國凡上表奏則翰林書辭用寶函封畢授尚寶以髮版夾護然後行一日所上髮版內夾獎故紙既達行在內侍以聞命臬司詰所自仁廟召翰林尚寶詢之故彥實對云在函封內臣不敢預知函封外則臣之罪遂遣彥實自陳其同官在扈從者教之援翰林以覲倖免彥實曰不敢自欺况敢欺君臬司論彥實不敬有旨薄罰復職以是廷論重之仁廟嗣位首進尚寶司卿授奉議大夫賜誥

命以所授散官追贈其父封其母太宜人又九載加四品祿彥實樂聞善言初官侍近日接內閣諸公自念我為庶民望斯人如在雲漢何由得聆一辭今辛旦暮相親其可自棄袖魯論一編遇靜間處輒揖請教二三公皆樂為之盡既終篇常涵泳不厭而日臨寫智永千文一過不廢其為人閨敏易直謙和無競交處有誠享年六十有六而卒娶楊氏封宜人子男二昱昂昂為伯兄後襲旗手衛正千戶從征麓川夷積功至本衛指揮同

知彥實疾甚適昂奏捷歸將復行昂憂恐不忍去側將
白其情於朝彥實聞之曰受君命可顧私耶趣昂行後
三日彥實卒臨終清明如此女一嫁都指揮胡寬孫男
二源浩彥實之將易簀也顧家人無他囑但言少師公
知我我死必求公書墓石即死含笑地下無憾矣既卒
朝之卿大夫咸往弔祭於是昂將奉柩歸應天府祔
葬城南鳳樓鄉于宜人之墓之次遂奉尚寶卿朱禮所
述事狀來致治命狀固不若余知之悉也嗟乎彥實孝

親敬兄為子為弟之道得矣事君不欺亦得為臣之道此士行之大者若其他行亦多可書故為之書俾刻焉

贈奉直大夫右春坊右諭德黎君墓表

正統元年六月臨江之清江故處士黎君以子恬貴承誥命贈奉直大夫右春坊右諭德配鄒氏贈宜人恬請告歸舉焚黃之典求余表其考妣之墓士奇於恬素有斯文之契今又同在史館不得辭按翰林修撰習嘉言狀黎氏之先析自新淦三洲居清江之板城里族益蕃

衍世篤詩禮曾大父子信大父允誠皆隱不仕父惟琇
元季兵亂率衆保其鄉歸國朝授昭信校尉通州衛百
戶自昭信而上皆有厚德奉直諱應本字宗瑞有孝友
忠信之行勤詩書敦用禮義治家嚴肅於嫁娶喪祭咸
遵古式厚於宗姻訓飭子孫及族人子弟悉就規矩奉
直為人端恪和豫雖沍寒盛暑私居不見惰容公正明
決里中有競爭不能平咸往求直推所有以濟匱乏雖
數不厭鄉號長者疏達有才具弱冠朝廷新作京師城

令民陶甑以代賦邑推舉奉直董造運又推長千夫治
海舶又推長萬石區賦者十餘年皆不亟不徐而事豫
集蓋愛人有誠制事有道而未嘗私其一毫之入是時
同事有迂視奉直而急私慢公以償及身家者未嘗不
自悔其不為奉直也奉直於隆師尚友尊賢敬德恒恐
不及事石門梁先生尤篤又遣子從之學至於張編修
美和劉山陰仲修皆所厚善而凡一時名人碩士率相
交處所居城南多沃壤閒暇課僮奴耕藝自適名其堂

曰耕樂又作松菴以貯書籍圖畫旦莫吟咏其中素嗜
作詩而老益工其自少壯至老未嘗一日無公私之務
而其中蕭散閒適恒自餘裕春秋五十有五卒以永樂
四年三月三日鄒氏同里人淑德令儀允配君子後奉
直七年卒永樂十一年六月六日也春秋六十有六今
合葬新喻官塘里金盆山之原子男三孟程先卒仲慎
以明經徵援疾辭後若干年亦卒季恬永樂壬辰進士
授陝西道監察御史南靈州知州右春坊右諭德皆以

文行名於時女三孟先卒陳孟韶黃次聲其仲季之婿也孫男六經有文學早卒綱統縉頌生顯生孫女五曾孫男六昌晟生畱生昇生冕生昇生曾孫女七於戲奉直君才足以治政德足以長民然生未嘗霑一命蓋其志安於處也而身後之命之必至者教成於家之效其亦為善自然之應也歟敬為之表以示後人云

奉議大夫禮部主客郎中王君墓表

松江之華亭有君子曰王叔高甫澹素而好德貞靜而

樂志脫畧乎窮達死生之累其子官朝署考最績承疏
恩封父母五品秩叔高甫為奉議大夫禮部主客郎中
叔高甫拜稽受命而持恭謹謙抑顙顙焉無一毫矜滿
自足作於意見於色而愈益飭勵其子欽厥職以無忝
榮命年七十有三慨然曰即百歲亦猶是耳昔杜牧之
自誌墓豫身後事吾雖無善以嗣古人而得今人之名
能文者槩存其平生且及目見之也即死足矣於是其
子以求翰林侍講學士臨川王君又某年叔高甫捐館

宣德某年月日也春秋幾十有幾葬邑城南秋涇之原
其孤濬求余文刻墓上之石按王氏之先居金陵元至
正中諱德彰為崇德州都目民德之為建惠政碑既老
退居華亭叔高甫之考也叔高甫諱鎬蚤通經史敬言
行事父母孝兄錫為臨川知縣卒於官躬往歸其喪及
其孤澂而教育澂底于成立後為浮梁知縣有稱此其
行之著於家也恒舉所有振匱乏恤災患助婚姻喪葬
之不能者此其行之著於鄉也教其子孫及鄉人之子

弟必在於孝弟忠信學古務善晚取古人存方寸之旨
自號留耕道人此其所存之厚也叔高甫於醫藥卜筮
之書咸通而尤好法書圖畫琴瑟又可想見其清韻配
邵氏處士憇之子內助允淑封宜人子男三孟湔仲渲
季濬濬永樂中自太學生擢禮部主事陞郎中歷事四
朝有能名女一歸孫節孫四永育畿甸嗚呼世之人需
一命者或有快焉自得馳騁其意氣揚揚不復圖進於
善道又或汲汲營所欲疲精神勞筋骨至耄耄而猶不

止者於視叔高甫之事豈不霄壤懸絕哉叔高甫之墓其宜有表也

前台州府通判陳君墓表

前台州府通判陳君沒十有四年其子嶷以翰林侍讀苗君所述事狀求表其墓苗君嘗為余言至于今鄉之人皆能道君之忠厚有為而台之君子仕於京者又為余言君學問之博操守之嚴世不多見且知吾故人陳煥嘗奏舉君君信賢乎哉則表之以示後來何辭按陳

之先家譙唐兵部尚書舜舉之後諱仙者始徙今鳳陽之蒙城君曾祖德仕元為金鄉縣尉祖華甫為河南江北等處行中書省理問追封蒙城縣男父岱官至山東行中書省參知政事母何氏君初名友亮既被薦入見太祖皇帝悅之賜名巖其字維石自幼有孝行稍長一志於學所習日有程度不少懈而資識明敏器度宏偉鄉閭老長咸器重之初薦至未授官適湖廣峒寇不馴上命吏部選才識通辨者往宣旨撫諭而君在行及境

寇猝數百人持兵唬至同行者皆色怖君勵聲曰吾輩奉天子命來何怖遂獨前從容諭寇曰若等皆良民聖天子念邊臣乖於撫綏致若等弗寧故命使者來諭德意遂具宣上旨寇感悅悉棄兵羅拜卒以帖服既還戶部奉遣督逋租於湖廣之常德至則察其土瘠人貧白於朝請令輸鈔帛代租從之一府賴焉始授祁陽縣江湘市巡檢察姦搜匿境內以清常德知府鈕衍薦其才陞浙江慈溪縣丞縣民困於田租之增額者為奏罷之

嘗久旱躬走百里外禱鄞山之天井潭翼日歸雨隨注
四鄙霑足歲大熟在邑六年有詔求賢上元知縣陳煥
舉君應詔陞順德府通判授承直郎有惠政丁內艱去
服闋改台州府通判陞承德郎專督農事周歷屬邑致
勤弗倦隨原隰以課樹藝固陂堰以備水旱教導有法
期約有程而以惠恤為主民利賴之號之為佛云時詣
學宮勸勵諸生親與講析將九載召還居無幾奉使命
出過蒙城以疾卒于家疾革顧其諸子曰吾得首丘焉

足矣獨恨食上之祿未有報也汝曹力農以供賦務學
以致用庶幾副吾心耳永樂廿二年正月初十日也君
持身端介未嘗苟取一毫言動循禮慎交際居官一務
厚民蓋年六十而卒以卒之月廿五日葬邑東南之原
配李氏有婦道子男四人岐嶷崢嶸女二人長歸臨海
縣儒學訓導李青次歸蔡敬孫男十有二人嗟乎古所
謂愷悌君子民之父母非陳君其人歟使陳君得一郡
而專之以施諸其人豈下古循吏然一時之為郡者何

必其優陳君哉矧陳君之才匪直一郡哉今幸遭聖明
孳孳簡求牧守之是亟而陳君不逮非陳君之命歟非
陳君之命歟

薩孝子墓表

孝子諱琅字用謙其先居今之順天府宛平縣其父諱
仲禮仕元為福建行省檢校因家閩縣其母沙氏孝子
生七年檢校君沒其家素窶母誓守節不更嫁用長育
遺孤男女孝子時雖幼已能究知母心卓卓有立志旦

莫躬採拾為養間得一味而甘必以歸養母恒弊弊焉
惟母之寒餒是憂而已之寒餒勞瘁未嘗計也舅氏金
孟相學行淳篤稍暇輒往從之惟其訓之聽力學弗懈
母心樂之母疾孝子晝夜侍左右躬煮藥進及疾劇衆
醫罔所措孝子夜露禱北辰冀以身代母母時不食飲
已七日忽蘇言曰適見人告我爾有孝子加爾壽三十
四母疾少間而成風痺卧起皆孝子與其妻躬扶護雖
中裯廁器皆躬澣滌愈久而愈勤母卒距復蘇時實三

十四月云孝子居喪哀毀終身語及親悲不自勝郡縣
欲薦舉孝行及奏求旌表者孝子聞之皆力辭鄉人林
崇為著傳有司亦列其行於郡志上之鄉閭老長勵其
子弟事親必舉孝子為說有素不能事親者聞孝子之
風亦愧恥改行孝子有女弟撫愛甚厚於利未嘗苟取
一毫嘗購馬氏地作室平治得白金一器舉以歸馬馬
請內其半拒不受於廢圃得一囊皆金珠求其女歸之
治家嚴肅警其子問學必以古人為師凡與學者言言

躬行實踐與仕者言言事君愛民處鄉黨朋友必誠必
信樂靜安貞未嘗一涉跡貴勢之門春秋六十有六而
卒正統元年十一月某日也娶林氏其子二男長琦舉
進士今為翰林院編修次璘早卒三女皆有歸孫男一
文昌琦從余在館閣數年余嘗熟孝子之行今琦奔訃
將歸余弔之琦奉史官陳叔剛所述孝子事狀泣拜請
曰惟先人墓石未有表也幸哀而畀之叔剛孝子同里
人又言邑中嘗旱民耆老禱久而弗應或曰豈非誠意

弗至乎曷如致薩孝子偕禱衆應曰諾孝子聞之即齋戒赴禱遂雨他日里中火災勢張甚衆無可柰何共輓孝子孝子及其衆叩頭籲天祈哀矜火遽熄嗟乎此豈聲音笑貌之所能為也哉孝子之墓宜有表不其然哉不其然哉

夏伯亮墓表

吳中有蕭散閒適之士曰夏伯亮氏喜浮游江湖而舟楫之行因以遷易有無濟民之用亦有什一之資於已

也其言曰吾之為是也非若端木之少窶亦非若膠鬲
之丁衰世惟其心之適於游矣蓋嘗踰大江涉淮徐道
齊魯以達乎燕薊歷覽其山川而訪問古人之遺事以
豁其胃臆然猶自號商潛凡所得貨息有無蓋未嘗計
也伯亮諱亮世為蘇之某邑人其大父君實父文通母
某氏伯亮蚤喪父能挺特自立事母孝母數舉其孝以
訓勵諸孫伯亮於親之葬祭皆謹而教其子必務忠信
孝弟恒取古人言行以導誘之居鄉黨率交其賢者與

人處不自擇利便臨利度義周人之乏赴人之急不慕
榮不慕名既老子孫日衆乃買田淞南築室婁上逍遙
雲林泉石之間又號婁東散人喜賦詩寫山水林木有
佳趣好古善鑒別於凡器物款識及圖畫定為某代某
人而第其品格悉精當洪熙中用子貴封徵事郎中書
舍人命下而卒是歲三月十六日也春秋七十有三配
石氏有慈儉之行式勤內助子男四男景嵩晟昂自永
寧縣丞陞中書舍人景舉進士翰林庶吉士中書舍人

吏部考功主事女二長適歸安主簿陳益次適龔珩孫男四欽鉞欽鐸曷昴皆嘗從余在翰林而昴最久自為狀求表父之墓故叙次而為之表曰

其秉之恒其履之平處澹適清忘榮與名既壽考終有子在廷惟天明明祐善有徵

河南知府李君墓表

先皇帝臨御宵旰勞動圖惟安民之道簡求賢俊任之牧守迺宣德五年命監察御史李驥為河南知府賜之

璽書命革民所惡而與其所欲河南地大務殷其民數
困於旱澇又壓以親藩之重其嬖近及將校怙勢厲民
民不勝弊李君至辛勤信詘起仆濡槁實虛而正綱紀
明憲度民始有蘇息意而向之為厲者不得縱肆咸不
愜志相率假親藩勢以摧君朝廷聞之悉捕假勢者置
諸法君政治益行中貴人過洛陽有逼取縣帑白金去
者君聞之遣吏馳追索之中貴人知君遣追俛首探懷
中出以歸之默不敢一語在郡興學禮賢均賦役弭寇

盜咸盡心焉致勤職事率昧爽坐公堂或日中是不暇
食郡嘗大疫捐俸市藥以濟民嘗大旱躬禱嵩嶽雨隨
降霑足所治一州十三邑吏憚其清民德其惠鄰郡民
有爭訟不平率走庭下求直為河南六年卒卒之日其
僚屬及民者老哀之如喪親戚古所稱良二千石君其
人哉君諱驥字尚德生六歲而孤自少知務學謹言行
見重於師友治詩經中山東鄉試為太學生洪武丙子
車駕臨太學親拔生徒十八人為給事中君與焉授戶

科奏罷關市檢察商稅苛細之弊居無幾坐累免官後
用薦起知新鄉縣為之有方雖時供億繁而民無擾招
徠流亡數千戶咸俾得所丁內艱去民猶數詣上官乞
奏留君不報服闋改知東安縣招撫流亡如新鄉勸課
農桑凡民所未便者悉奏除之縣多狼嘗噬寡婦子寡
婦訴於君君反躬自責而白寡婦寃於城隍神翼旦噬
所有死狼云廷臣交奏君治行召為刑部浙江司郎中
議獄平恕嘗上疏言崇教化重農桑育賢才選守令惜

民力恤軍士汰冗官養廉能抑倖進簡馬政通鈔法等
十四事多見采納在刑部三年又坐累謫戍邊仁廟嗣
位下詔求賢近臣奏舉君召為貴州道監察御史愈益
自奮振舉風紀慷慨持論未嘗以訐為直嘗陳時務十
事皆嘉納之巡歷所至斥姦貪獎賢能人用悅服馭下
以簡居官稍暇手不釋書冊堂室至廩庾率揭銘以自
警所用物雖几杖之微必取正直不可以苟在河南於
治之後堂植梅竹松恒退食其中名堂曰四友其一君

自謂也一日宴賓客堂中譚笑之頃奄卒正統元年六月二十七日也春秋七十其先世居青州業儒後徙充之郟城曾大父紹宗大父輝祖父壽康母朱氏以君貴贈父監察御史母孺人封妻劉氏孺人子男五長隣長垣縣儒學教諭次傑次英次輔次恭輔先卒孫男二興道興邦士奇與君同朝素熟君德善於江陵楊公弘濟江陵公嘗為君著傳至是又道隣求為墓文嗟乎李君外嚴重而內明恕處也孝於親惇於鄉仕也所歷勞績

焯焯而冰檠之操夷險不貳嘗自號復一貞士考其平生隱顯窮達履之正執之固所云貞者不其然哉不其然哉故特為之表

贈文林郎河南道監察御史劉君墓表

君諱循字率性姓劉氏系出漢長沙定王發初繇長沙徙安成後由安成徙泰和珠林累累有科第為泰和之望又由珠林徙吉水夏朗又累累有科第為吉水之望宋咸淳元年進士官至文林郎桂陽州教授曰天聲其

子益厚始不事進取而益厚子惟德孫永寧皆以博學
博行見重於鄉黨君永寧之子也早知務學師從父湘
陰州同知鶴皋任縣丞長輔及鄉貢進士王光薦咸器
重之治書經博通子史百氏有志舉進士業成而科輟
暨科復父母俱沒慨然歎曰不及於養矣祿奚為哉遂
不出志於訓子弟猶勉其從科舉曰學者固將行之且
吾世業不可無繼也平居事親孝奉養奠祭皆以禮撫
弟妹恩意曲盡以耕學立家而行之以勤儉為人公方

不肯苟且阿徇言出而人服襟宇洒落喜種竹環所居
數千竿題曰竹齋時時掀髯歌咏其中不與塵俗接也
蓋年五十有五而卒配王氏繼張氏子男四長鼎貫永
樂乙未進士為監察御史次亮次敞次衍女三人長適
王若旦次適張宗璉永樂甲申進士自刑部主事再陞
為大理寺丞次適曾傳昌孫男四洪熙元年用鼎貫貴
贈君文林郎河南道監察御史余未及識君而與宗璉
鼎貫游皆篤實自重蓋有以知君矣而君弟續述君之

行稱其材猷智識度越常情學士曾公嘗誌君墓歎其
使得施所蓄所至未可量則君之處也豈不足乎用世
之具哉非各有志乎鼎貫又求余言故為之墓表

故廣西布政使司右叅議林君墓表

廣西布政使司叅議林公永樂九年九月七日卒春秋
五十有一林之先居光州固始唐末諱靖者從王審知
于閩以功封忠烈侯終于閩子孫遂家福清之古隆至
元諱廷玉隱居不仕生考亭書院山長時中山長生福

建行省負外郎子華公之父也負外元季鎮潮州又家於潮公諱興祖字伯禎幼穎敏嗜學七歲而孤母陳守節不嫁教育之稍長出從明師十四能屬文十五從師授春秋經日習舉子業家貧教授以養母而能盡孝母嘗坐舅氏累及至縣庭將笞之公叩頭哭哀請代笞縣併釋其母子翌日縣以禮幣舉孝廉上京師授山東蓬萊縣主簿持恭慎凜然冰檠之操三年坐稽公務降龍江驛丞丁母憂去服闋改儀真遞運大使陞邵武府倉

大使郡中歲饑尚書夏公時巡撫福建得便宜行事郡
集其屬謂曰民孱可憫孰能詣巡撫求賑者方隆暑憊
赫衆莫應公曰興祖當行即懷郡牒晝夜倍程以進夏
公覽牒從容未有言公懇懇言民命危急仰公如慈母
義形於色夏公遽檄郡發廩所活數萬口郡守丁原振
薦公于朝陞當塗知縣有寬惠愷悌之政興學以育才
表善以勵俗而廉操如蓬萊吏民戴之滿一載陞代府
長史賜勅諭及襲衣文綺當塗耆老數十人伏闕下乞

留不得皆涕泣去公為長史夙夜思所以匡輔之道疏陳十餘事又隨事直諫不見聽朝廷知之召還改工部都水郎中居無幾陞廣西右叅議時安南逆命朝廷方出師討叛授之事命馳驛焉既至即躬詣邊境周視嶮易繪圖以進且獻所規畫又請兵之所加止罪叛逆預禁將士俘獲生口用慰來蘇之望踰年安南平郡縣其地調交趾綏輯降附振起凋殘夙夜盡心焉一日餘寇復叛公分守盤灘城所招降三十餘人皆在城中寇圍

城急主帥慮三十人為變將盡殺之公曰吾既許以不死殺之不信將何以得後來者且三十人何能為卒不殺而寇解圍去公在交趾再歲朝京師至滕縣卒其為人端重有雅度終日端坐人未嘗見其疾言遽色事寡姊如母訓育孤甥如子卒致有立其友張禮聞為學正死賓州子政孤弱不能歸公至廣西召與其子同學業成厚贖遣歸後政亦致顯宦公居官有實惠及人性澹泊不殖貨利家無餘貲惟積書數千卷嘗指示其子曰

吾以是遺爾足矣汝勉之好為古文所賦詩有棠陰清
趣集藏于家其配黎氏故名族有孝德後公十年卒子
男一厚永樂辛丑進士今為鄭州知州女二長歸段某
次歸百戶周鎮孫男五舉皋輦準女二公卒之明年
厚奉葬于郡韓山之東先塋之次今二十年矣具事狀
介吾友彭子斐求墓表余其會試禮部時考官義不容
辭故叙次而為之表曰

孝篤於親行備於身仕有及民嗚呼伯禎君子哉若人

太常博士楊希淳墓表

吾泰和楊顥希淳永樂辛丑進士授太常寺博士能謹其職事有稱於縉紳君子三年天官考其績最援例奏授勅命贈其考彥通文林郎太常博士妣韋及故妻劉孺人而封其繼母周為太孺人顥遂奏請歸舉焚黃之典命下而病作更數醫不治宣德七年十二月初三日卒於北京享年四十有五搢紳君子聞其卒皆嗟歎惜之希淳為人篤實清慎事親能孝事長能恭處人能信

臨財顧義其貧未嘗戚貴未嘗恃直而不肆質而不朴
澹而可親吾識其大父舜卿及其父皆鄉善人希淳會
試禮部時余其座主也其為博士也公務甚簡余邀置
隣居而關館延之授徒凡再歲旦夕相接察其言行表
裏始終一致焉嗚呼鄉人俊秀以言語政事馳聲譽自
視高出希淳上者比比而是而夷考其行平實如希淳
者蓋無幾人吾恒私計希淳足以長保祿位無顛蹶之
患而一疾遽已非命也夫非命也夫然君子於希淳之

論定矣其弟希武以其櫬歸葬泰和吾故書其行之槩授之使表諸墓其詳見諸墓銘者不復出也

何子玉合葬墓表

太醫士何彥徵在京師以醫見重公卿大夫而於余往還十餘年相與尤厚其為人孝友平居致其父母之樂既徵詣京父母病且沒皆不獲在侍下語及輒泣涕潸然一日具其父母之德善詣余拜且言曰不肖孤不孝親在不得盡終養之私親沒既不能卓然有立以顯揚

萬一又不能圖不朽於薦紳先生文字間是重其不孝也凡世之不泯其親者率有表著於墓今竊願徼惠下執事余固樂道人善矧惓惓孝子之心哉按何之先汴人宋有諱某號進齋者為國子學錄從高宗南遷始家鎮江之丹徒世業儒至諱暹字明德辛苦力學遂名所居齋曰明德用自儆學成不仕以醫可以及人遂精究岐黃之書有名於世其子煜字景宣亦深於醫而切於惠濟所及人尤廣娶石井里儒家茅氏生子男三人子

獻子玉某子獻務學善楷法洪武中召書誥西掖既當授官引疾辭子玉彥徵之考也諱璧為人和厚謙慎於事親敬長咸當其分宗戚有孤貧無依者教育之底於成鰥獨者供養之終身賢士君子多樂與之交其禮度雍雍如也卒於永樂戊子九月十日春秋五十有七配郭氏元市舶副提舉原德之孫處士源之子諱妙寧生有令質年二十有五歸何氏於事舅姑有婦道相其夫有妻道成其子有母道可為女德之備者歟永樂庚子


十月十日卒春秋六十有七合葬其邑之長樂鄉鳳凰山之左子男二彥徵彥宗女一歸吳祥先卒孫男四雋儀倫佑女四吳信楊悼其婿也其二尚幼曾孫男四女二考何氏之先以儒醫聞若子玉之太父父所及人多矣至子玉其施於躬儀于家亦皆善人長者也雖未嘗顯融於時古稱仁者有後將其子若孫之振耀光大庸可量哉庸可量哉

周宗苑甫墓表

顧山之西麓周氏暨陽名族也世有善德暨陽多巨室
而至今言務善之家必首推周氏蓋自其郡邑之賢守
令與士君子而下至閭閻畝畝無間辭云周氏至伯源
當元季寇亂東西竄避備嘗艱苦我國家平定海宇始
復故業辛勤薙莽除荒治田廬以務本植善功未半其
鄉譁訐之風起伯源不幸陷誣謫戍山東後徙雲南
宗苑甫父也宗苑甫諱閬方其父去時始成童念其父
志之未成也奮起卓力致勤蚤莫家日以裕而飭躬務

學孝友睦嫻之行見稱鄉黨公家徭賦惟恐或後又不幸陷譁訐者之詿誤謫戍廣右後以疾代歸方將優游田里以奉親教子自適居無幾疾加竟不起永樂五年十二月十六日也春秋四十明年葬顧山之陰祔其祖之塋宗祀甫儀觀豐偉端重闊達有智識忠信樂義雖處艱難細行必謹平素急人之急賙窮卹喪視為當然惜其不及下壽且憂患之日多也配夏氏子男二伯曰璵仲曰珪皆謹行如父女二李樞郭琛其婿孫男三振

拱某女九至是璫珪痛其父之生不獲伸也將圖伸於
沒之後奉事狀及書求表墓嗚呼暨陽素稱道院蓋謂
風俗醇厚清淨無事也數十年來薰染鄰邦澆漓囂訟
之風往往有作雖不過千百之什一然騁其險於傷人
害物善良何以遂安也宗苑甫父子是已宗苑甫雖憂
患艱危之際而立志持行顓顓不改平時豈非君子者
歟故為之表



東里續集卷二十九

欽定四庫全書

集部

東里續集卷三十一

詳校官檢討_臣羅國俊

中書_臣劉源溥覆勘

總校官進士_臣楊懋珩

校對官庶吉士_臣嚴福

校對官庶吉士_臣毛鳳儀

謄錄監生_臣陳瞻燧

謄錄監生_臣桑英

欽定四庫全書

東里續集卷三十

明 楊士奇 撰

墓表

蔣志祥墓表

泰和邑之西四十里曰嚴莊其故家曰蔣蔣氏之兄弟
之賢者曰吾貫吾望卜改厝其考處士君乃寓書及翰
林編修蕭鉉所具處士君事狀求余表墓余少嘗聞蔣
氏之德善於其塾賓蕭尚魯先生而今於蔣氏為婚姻

家不可以辭按蔣氏之先居長沙唐季曰紹錄者舉進
士官至侍中後避馬氏之亂徙泰和初家梅溪里數傳
至正卿徙嚴莊至必濟號竹莊竹莊生宗周元袁州學
提舉提舉生以信處士君父也世以仁厚致家於饒裕
處士君兄弟三人處士其季諱玄字志祥幼失怙而蚤
有立志遜父所遺資業於二兄二兄不聽則裁取給用
而已不求有餘也二兄強從其志於凡徭賦百需悉不
及季鄉里高其行義然處士躬勤力本儉約率下家亦

用裕然汲汲圖紹世德拓故址作堂名曰正心歲時聚宗族及冠婚賓客燕享悉於斯堂族人不間疏戚貧富咸相親睦有無共之延名師教子姪而躬程督於內子姪亦皆循謹秩秩遵奉處士君之教處士君於鄉鄰賙窮恤匱亦無間焉為人質而溫直而不肆於物無迂然未嘗苟徇人無少長愚良皆愛敬處士君號為長者故自少壯至老所履坦坦無憂患之干蓋年五十有五而卒卒以永樂二年八月十八日其配彭氏繼劉氏皆有

淑行子男三長吾敬後處士君數年亦卒次吾貫吾望
咸善繼述女一歸劉民瞻孫男十恢亮恢廣恢彥恢貢
恢敏恢俊恢周恢重恢仰恢碩恢重予子婿也曾孫男
十有三人嗟夫世之不古久矣同氣之親有競毫末之
利相與鬩牆甚至相目為秦越者比比也其有能讓同
父之業為友恭之行者蓋千百之什一若富而能仁其
宗族鄉里非古之人乎處士君其應表也敬為之表以
示法其子孫鄉人於無窮云

贈中議大夫贊治尹大理寺右少卿陳君墓表
士有效用於國深被簡知而不為爵祿所縻從容自得
不枉其道必其智識明正審內外之辨察事幾之微確
乎中而不可奪此不謂之豪傑可乎我國家龍興之初
有若金陵陳中行先生者殆其人歟先生諱遇中行其
字天資純粹自少篤學博究經史元至正中授江東明
道書院山長温州路學教授遠近從者紛集講下元綱
不振兵亂四作遂棄官歸隱間居一室安澹守約名其

室曰靜誠鄉里遂以靜誠號之先生憫世亂益甚每夙興焚香叩天願早生仁聖以活創殘我太祖高皇帝定鼎金陵時南臺侍御史秦元之素知先生入言於上曰陳遇有輔翼才宜寘左右使效裨益即日召見與語大悅禮待加厚稱先生而不名日侍帷幄贊幾務車駕幸其第者三命之官輒辭臣民既推戴上登大寶所承諮問悉保國安民大計先生竭心摠誠多所獻替命為學士翰林者再皆固辭嘗奉密命偕中官趙信往視浙江

還奏稱旨賜白金又命為禮部侍郎又固辭間邁疾賜藥命中官挾太醫院官視療時微寒特賜錦被及上供米既瘥入謝上嘉獎連稱君子者三又除禮部尚書又固辭自是不復強之以職每召見錫賚必厚或坐久必賜宴間命廐馬送歸先生秉義懷忠非正道不陳群臣以過被譴者率為解釋上亮其誠未嘗為忤數諭之曰卿老不欲仕有子令帶刀侍衛叩首以子幼辭蓋靜澹恬退始終一志前後所得賜問宸翰頗多眷待之厚亞

於勲戚蓋春秋七十有二而卒卒於洪武甲子九月十日計聞遣中官賜祭加東園祕器及賻命葬鍾山長林之原右春坊大學士董倫為誌其墓陳之先家於曹宋龍圖閣待制義甫從高宗南渡累官金紫光祿大夫沒謚文忠始家建康至理宗朝武功大夫淮南諸路兵馬都統制執中先生曾祖也祖文德元舉進士授溧陽州判考辛之淮南鹽課提舉妣某氏娶金華王氏繼維揚周氏皆世族子男四孟傑孟學孟德恭三女傑德俱

早卒女皆有歸孫男六綱紀純綬紹綜女四恭舉鄉貢累官今為通政司左通政有才名於時朝廷以恭貴累贈先生中議大夫贊治尹大理寺右少卿周氏贈恭人於是恭奉事狀拜求表墓余聞先生志尚清遠興韻蕭散味道之餘游心繪事嘗寫高皇帝御容妙絕當時然未嘗自名世亦無能得之者先生有弟中復洪武中嘗隨入侍永樂初授翰林待詔余數得晤語其為人端重清雅不苟言笑間出論議娓娓近道亦妙繪事為文皇

帝所重時中復子孟顥以善書從余翰林簡靜修潔絕口不道繪事余間與中復語及之曰此兒頗有志操不屑意鄙事走也少年在先兄側戲弄筆墨先兄叱曰吾豈他無一長汝乃習其下者今雖老每思前言未嘗不內愧然無及矣嗟夫先生履素操潔識明義正革運之際躬荷知遇卒完所守以歿雖一藝所耽昔人不免春苑池之屈先生浩然之存不為時屈非一時之豪哉逮其後來如中復父子猶嗣承無忝又可以觀先生之刑

於家也惜其遭際對越之間必有裨國及民之實既不自言其當時耆舊知先生者又物故已盡遂泯無傳故特書其大槩俾恭刻石墓道

族弟仲穆墓表

吾西昌楊氏自始祖至吾兄弟凡十七世自始祖以下初皆單傳至八世昉析二派皆居邑中伯之派七子居西城仲之派二子居東城居西城者富甲一邑莫或與等而詩書行義卓卓出鄉黨居東城者田園裁足給其

詩書行義與西城相高而忠信之行文學之華遠近欽服而以進士得官累累有聞焉自元季兵禍輾轉數十年城邑荒隳高門大第莽蒼榛荆瓦礫中人民幸存者百殆一二而流蕩散徙無寧居焉逮際皇明混一之運有能復其故業盖千百之十一於時楊氏之後其僅存者皆退處山谿林谷間雖不廢詩書而自食其力恬澹怡愉無外慕之心族父與良其一也既攜其家之澄江之南一舍許擇雲亭鄉之中村依先塋以居娶龍氏王

氏生五丈夫子皆淳厚謹飭其四曰伏生字仲穆事父
母甚孝養生葬祭一致其誠謹持其身不敢有所踰越
教其子必曰毋忝先世撫孤姪有恩意處鄉人恭而能
下有言人皆信服平素力於善行所不樂為者浮圖老
子之法將卒猶以戒其子蓋年四十有九而卒其卒以
永樂十四年八月十九日其大父以上見吾所著譜牒
其配邑西陳氏元贛州路推官梅村先生曾孫蓋陳楊
世婚姻家如古豐朱陳云其子男五德崇德純德修德

淵德敷女一孫男十四女五曾孫男二德敷正統二年
進士授大理評事楊氏城西之派以進士得官實肇於
德敷人皆以為有父之賢也德敷嘗求表墓故特為之
書

袁進士墓表

正統四年八月十九日泰和進士袁和卒於家相知者
皆悼惜之蓋惜其負才諳而未見諸用也袁故邑中文
獻家科第仕宦累累有聞於宋入國朝以科第進昉見

於和又遽已矣知者焉得而不惜哉其高祖以寧曾祖
務敏皆恂恂溫雅為鄉善士吾童卯時皆親炙之其祖
克睿父仲暹亦克世其德余少皆與之同學和字淑景
自少穎悟過人好學問從鄉校師同門皆推讓之御史
及藩憲之臣行部入學宮察試諸生文藝皆獎重和既
去之他學必舉和以勵衆由是江右十三郡六十九邑
之學皆知慕和既選中鄉試及會試中副榜當授教官
有旨令進學北京國子監以俟下科遂登正統元年進

士第循例觀政禮部奉使命廣東竣事還過家省父母
父以疾沒既殯矣號慟乃起北趨復命遂請銘歸葬父
居喪謹禮服闋將詣京師得疾遽卒享年四十有六其
為人疏通警敏善經畫明知人揣事勢後當何若率中
謹持其身居家孝友處宗戚朋友鄉黨有急能赴為文
操觚立就而皆傳理有志事功以用無往弗宜而遽不
起豈非其可惜哉母陳氏前進士興寧縣主簿士瞻之
女初娶白氏繼室卓氏子男七勝舉肇敞監繼吉肇余

孫婿也。敝先卒女二長嫁梁英次尚幼。孫男一昉。余仕於朝四十年。已未之春。始獲蒙恩歸展桑梓。時平昔親交凋謝已盡。獨淑景以姻家子弟旦暮相往還。出入相扶助。談論浹洽。余甚期望之也。別未數月。遽聞其訃。悼歎不已。故為辭哀之。使其子刻諸墓。辭曰：

才之生兮。豈多命不延兮。奈何我懷之人兮。徒永嗟。

封徵仕郎虎賁右衛經歷仰君墓表

蘇之長洲有孝友謹勅之士曰仰仁澤鄉邑宗婣重其

行無間言嘗以其子之貴封徵仕郎虎賁右衛經歷春秋六十有七而卒吾友翰林檢討陳君繼銘其墓其子瞻告余曰銘掩諸幽矣惟先人之篤行宜白於外也幸先生書其墓上之石雖沒不朽按陳君所述仰氏家長洲仁澤諱澤父均達母龔氏父坐累謫戍五開去蘇數千里仁澤時甫弱冠留養母撫弟妹然中心悲念父困苦遠道日夜無已一日跪白母免請往省父母歎曰汝尚少素未嘗越戶限百步外奈何冒險阻遠涉對曰免

年及丁矣人行萬里豈皆其素熟哉遂辭母擔簦獨行
數月達父戍所父子相見歡甚事其父曲盡愛敬凡父
日用所需措置悉備又數月父諭之曰吾豈不欲父子
之同於此也吾行時以汝母及弟妹付汝自汝來吾日
夜念汝母及幼男女之無所倚也汝寧不體吾心乎且
吾在此足自給汝母及弟妹之給不逮吾也汝其歸哉
諭之再三強辭歸歸而孝事母撫育弟妹皆盡心弟沒
又撫其遺寡孤甚厚弟之婦其外家有強之改適者婦

歎曰母子奚不足而他適乎守節不聽女兄及其夫相繼歿撫其遺孤如已子赴族姻朋友閭巷之急恒若不
及治家循禮度而教子以忠信儉勤安義命為要噫此
其所為見重於鄉邑宗姻者歟卒於宣德八年十二月
廿一日配鄒氏封孺人先卒合葬里中章墓涇之原子
男二長瞻次恭女一適李巽孫男女皆五瞻舉鄉貢初
擢虎賁右衛經歷陞大理右寺副遂陞大理丞端直之
存平恕之施清勁之操卓然於時固其本之於父也此

仰君之墓宜有表也

蕭德資墓表

屠維單閼之歲余歸自湖湘邑東南桃源蕭氏聘塾賓
蕭氏邑鉅族於是時老而壽俊壯而英彥風流文雅彬
彬焉余講授之暇相與周旋論議尊俎詠歌或登山而
攬白雲或臨清而玩游魚無日不樂蓋自其先世饒於
貲隆敬塾賓而前之賓其塾者多人他之號鉅族者
不及也余留塾僅歲餘蕭氏兄弟中德資相與綢繆特

厚及余被召入翰林在兩京德資屢以運賦至公事畢必過余從容留累日相勞苦道舊故臨別必有依依不舍之色遂約為婚姻又數年其子承恕書來求文表墓知德資謝世為之傷悼不已德資孝友惇義於財利落落不屑意賒貸有無償不計讀書通其大旨喜賓客尤喜承接儒師君子而淳質自用恥涉權譎事名家居之堂曰懷德奉親訓子之外循行畎畝視僮奴耕耨以此自足如不知世有理亂榮辱者非古所稱善人者歟德

資諱資德資其字蕭氏之先出梁國子祭酒子雲之裔
在宋曰伯原自峽江來知泰和縣遂留家焉孫漢卿有
科名於時至士鳴生文翁文翁生斯賢端重魁傑元季
之亂一鄉賴之為砥柱生安常志行肖其父洪武初父
子相繼長萬石區鄉人德之娶某氏繼某氏六子其五
德資也生洪武乙卯四月六日卒於宣德壬子二月七
日享年五十有八塋沙坑之原德資娶康氏子男四承
紀先卒承翼承恕承節承恕余子婿女二朱鴻劉緋其

婿也孫男二禎馥嗟乎習俗日媮知好利鮮知有義苟
惟知利馳騁其私智詭術靡或不至然卒及於僨覆彼
其初視德資之能率謂不已若也而德資優游恬愉卒
保其譽名以終善豈不可為乎吾故表之以示法其後
之人

羅孟昭墓表

泰和縣之西郭有處士曰羅孟昭甫年八十卒其子刑
部主事崇本纁經踵門泣拜請文表墓道余既弔之而

竊自歎前三十年嘗表其母之墓矣其冢子之卒而塋也又銘之予乃志其三世之藏耶然素於其父子往還且心有重於孟昭甫者不得辭羅氏之先家縣之仁善鄉梅山里後徙坳頭里貲產豐碩稱坳頭羅氏孟昭甫之高祖仲實罹橫逆以死而家遂落祖均瑞失怙五歲隨母張適劉茂林因冒劉姓既長能自奮而家復振均瑞生三男子孟仁壽仲文壽季良壽兄弟益奮以振仁壽孟昭甫之父也母劉孟昭甫諱道生幼穎敏父母愛

之遣從學鄉先生蕭尚仁無幾郡學選弟子員時吉水顏仲偉先生為教授又舉入郡學從顏先生既為二先生所愛方日嚮進而以病罷弟子員歸養親後遭父喪遂不出孝事其母恭愛其兄弟歲有司驗產甲乙出徭賦孟昭甫率先盡力未嘗為苟避計嘗輸稅之京師次池州適暴風盛作望中流有覆舟舟中人浮沉水上不能自救孟昭甫號於衆曰有能以舟拯活一人者吾予米若干數人者如其言馳赴之凡活五人即如數予米

五人者德孟昭甫更生已也拜且泣曰我等皆黃湓湖
畔人也今無以報公願得公姓字歸書於家之先祠吾
及吾之子孫朝夕致敬以祝公壽福後有過湖畔見五
家書孟昭甫姓字皆如其言孟昭甫有二子漸長慨然
自念吾蚤丁家多故不及學今幸有子又不俾之學吾
則不父遂作北齋禮致明師教之若尚仁先生及其子
靖江府長史用道龍泉縣學訓導龍仲雨廣西按察僉
事陳公延皆其人云恒重水木源本之念曰冒他姓而

不反是棄吾祖矣遂及其兄弟協議白有司復劉氏閒
居喜觀史鑑以考古人之言行無益之物未嘗留意以
勤裕家以儉自用而待賓客必豐腆一日得疾衆醫環
視之而藥罔效孫鏞請禱曰命也何有八十之年尚事
禱乎汝曹其務學毋自棄且語汝叔忠謹奉職毋忝君
親言已遂卒宣德九年二月廿八日也元配韋氏繼胡
氏子男二長璫舉鄉貢為國子生前二十年卒次宗本
宣德二年進士刑部陝西清吏司主事女四袁仲彬胡

秋輝樂象明嚴思濟其婿也孫男三鏞翰艸女三曾孫男一浚余之有重於孟昭甫者蓋雖大賢君子不能無過昔子路人告之有過則喜先儒以謂亦百世之師今之為士亦皆有子路之心乎雖千百未嘗無什一然好諛而惡直者多也間一聞責善之言不為巧辭以飾則殺色厲氣以捍遏甚者詬為謗已而仇讐目之其有能自反而自咎者乎是以其德日隳而譽日卑焉余家居於孟昭甫雖往還不數數也後在京師孟昭甫偕其所

厚湯如川過余迫暮止宿出酒相勞道及間濶時事如川伉直人也屢引事為讓孟昭甫受之怡然曰非公愛我不及此敬受賜矣而飲酒甚歡余猶意此一時彊服也久而察之無纖毫拂逆意余他日亦一二事讓之孟昭甫駭愕曰是吾過矣亦怡然受之不為迂而自是於余往還加密嗟乎虛已而聽聞義而服孟昭甫何可多得哉此余所為重之者也使世之學者皆用是心以求益何患於無成吾故表之為勸

嚴處士墓表

永樂十四年十二月初九日泰和之處士嚴俊德甫卒其塋也前翰林侍讀梁潛銘之矣處士之子頎等具行實并書來京師求表墓士奇先大母朴山先山玄孫與處士之父兄弟也士奇又娶朴山六世孫故處士見厚有素義不可辭嚴之先家馮翊唐末徙居廣陵五季又徙金陵金陵亂遂徙泰和泰和五世至震宋舉進士為常州推官其子執衡臨安通守臨安六世至肅祕閣校

勘朴山先生也見揭文安公侯斯所為碑文子用甫元
高安縣尹見吳文正公澄所撰墓誌又三世至從禮洪
武中國子學正娶鄭氏宋端明殿大學士穀之後生三
男子其長處士也諱定真俊德其字處士幼質愿克謹
不與羣兒狎學正先生授之業程度日嚴必勉至焉既
冠以其學出教里塾里中從學而貧者皆不取其束脩
曰吾豈以是為利哉先生在太學數年留處士治家事
歲必一再往省京師致供養之需先生歿塋祭不違禮

恬進取布衣於閭里之間非賢人君子不相親厚有餘
以貸人不苟計息貧不能償者併所貸不取教子必務
學曰此先人世業也又曰人之行求內無忤於心上無
忤於天此吾所以盡心焉者爾曹勉之恒自負其家世
不肯苟且屈下士或猥瑣諂佞賤視之如草芥以此寡
合而邑大夫禮士之賢者及歲舉鄉飲謀賓合東西郭
不五六人處士其一也嗚呼賢矣處士之卒也年六十
有二其配龍氏邑西甘溪里名家四子頤頤頤頤江

陰學訓導孫十暉晰曦昭明叵昉時尋暖古之君子稱
道人善必本其所自士竒童卯時及親炙學正先生先
生方嚴清介士竒以姻家子孫每見必承訓飭蓋至今
追憶使人敬憚不敢有侈心處士其家嗣非得於家庭
者厚乎嗚呼西昌前數十年前輩方正君子如先生者
多在故士有善行鄉有善俗而今不無可感者矣則吾
於處士安得不推本言之哉

紀善康君墓表

梁府紀善康君孔高年六十卒其子頽以翰林修撰曾
鶴齡所為行狀請表其墓余於孔高少年里巷交游也
不可辭按狀康故匡氏唐有匡胄為吉州判官始家西
昌祁洲其後曰稠者仕江南李氏為蘄州刺史歸宋避
諱改氏康稠之後曰克俊徙居邑中畫錦坊再世徙平
易坊又三世至仁安蚤卒洪武中詔旌表其妻陳氏貞
節仁安子德昭娶尹氏生二子長孔猷次孔高也諱岳
少從鄉先生蕭子上治書經中洪武丙子江西鄉試明

年禮部會試中副榜授祁陽縣學教諭改雲南縣學又改零陵縣學丁家艱服闋又改景陵縣學歷四學九載陞南陽府學教授所至正師道訓諸生皆有成績廟學壞者葺之士習陋者革之廣西四川鄉試皆聘考官嘗一赴四川士服其公永樂初歸自雲南聞繼母蕭病枉道趨省留侍九閱月刑部奏當杖仍教諭邊縣上曰母子相違萬里一見有難遽舍況於母病特宥之而除零陵仁廟封建諸子命吏部慎簡王府官尚書蹇公得孔

高所試文亟稱其學孔高時引疾屢辭不聽奏授梁府
紀善孔高致恭厥職王待之厚歲餘謁告歸省先塋至
則疾加遂奏乞解職從之歸至臨清不起宣德己酉六
月廿二日也塋以某年月日孔高有孝友之行惇義薄
利初出贅劉氏劉僅寡孤在孔高為維持門戶長其孤
穉有立然後歸不私其利一毫朋友死遺孤無依者取
為己子教育之嘗積穀外廩饑歲有擅發貸人而不償
者終不問在祁陽有商人病久其侶棄之去者孔高避

迨取歸予藥食及瘡又予道里費遣之在南陽淦楊氏
子行賈而盡喪其貲貧困依孔高孔高衣食之授之經
後舉鄉貢去其急義槩類此然未嘗有德色為人抗直
不事矯飾有文集若干卷藏於家元配劉繼羅四男五
女皆劉出男頤頤頤頤舉進士今為大理評事頤舉
鄉貢郭公綸辰州府學訓導陳禧劉臯曾顥羅某其女
之婿也孫男七士之學也在明夫義利之辨世之褒衣
博帶譚周孔而名道德者或於利毛髮許不相遜下於

視所親愛陷溺略不一動心引手或更下石焉者此烏
在明義利也哉嗚呼孔高其不忝矣夫其不忝矣夫

故承德郎北京行部主事劉子政墓表

嗚呼吾與子政甫別二十有五年每思鄉之善人端士
未嘗不在子政甫而今已矣余聞之悼歎不置於是子
政甫之子孟鐸求余文表墓余雖病不復辭子政甫劉
氏諱正其先居吉之安福後徙廬陵雙溪之金竹里曾
大父景山大父宗敬父原凱母戴氏子政甫晬而喪父

又數歲喪母稍長克知自立務學通古今而躬行實踐
先是宗敬弟宗仁仕元為貴州路總管邀宗敬偕行會
兵亂道阻不得歸國家平定海宇子政甫年十七徒步
走貴州迎大父歸養大父時已九十顧語子政甫汝誠
孝然吾耄且病不堪遠涉吾既久於此矣且諸孫侍養
不乏人即死葬此吾安焉不願歸也汝歸其修復吾田
廬不以墮先世汝之孝也既歸書思復二字於堂以自
勵凡先業為勢侵豪敎者次第悉復乃復走貴州省大

父則既沒而塋矣又以諸從昆弟執治命不聽歸塋大
慟而歸而恒慟不逮養父母歲時薦祀必誠必戚事二
姊盡愛敬教子與孫必在勤問學務謹勅初孟鐸在翰
林聞父母皆病言於朝乞歸省其詞懇至特命歸侍數
歲父母病皆瘳子政甫顧孟鐸言汝弟皆長有立汝勿
以父母故而後於君汝往哉孟鐸遂詣朝授吏部驗封
主事改北京行部吏曹主事宣德元年賜勅命封其父
母子政甫為承德郎北京行部主事母戴氏為安人人

皆為子政甫榮子政甫執謙退而益以修臣職報君賜
飭其子子政甫為人忠厚恂恂非其人不交非其當得
不取於朋友有信於鄉黨能恤貧周急平居課子孫詩
書外偕其同志二三輩放意雲林泉石之間翛然塵表
也喜藝菊嘗自號菊圃蓋春秋八十而卒其卒以宣德
五年五月一日其塋某原塋以某年月日子男三孟鐸
舉進士為翰林庶吉士再為吏部主事存心行已有儒
者之度次仲鑑次季鑰女四李昌復戴仲實彭志昂戴

若瓘其婿也孫男六女七曾孫男四子政甫嘗一至南京與余比屋而處連月故余知而敬之恒以謂使世之人皆子政甫何患乎風俗之不厚治效之不朽若故於今表而著之非獨其子之志亦余心有所不容已也

靖江府紀善羅君墓表

廬陵羅宜範郡舉材行詣京師從事兵部三年擢肇慶府照磨以其父紀善君墓表為請按狀羅氏始自豫章西山徙廬陵初居邑之馬凍里再世徙太安族益盛而

以謹禮名家十六世曰士敏惇儒行其子啓南耿介務義元季盜起將攻郡城啓南傾貲募勇從郡守禦諸吉水大抗既敗之而郡守欲分衆圍盜啓南固爭衆不可分不聽盜見官兵分勢薄遂奮決圍出啓南力戰死之其冢子齊正繼亦死於盜啓南紀善父也母楊氏紀善諱澄字齊淵未冠而孤痛父兄之沒於王事也語及輒流涕嗚咽而事其母至孝事寡嫂如母撫孤姪尤盡心而苦志學問從鄉先生羅伯剛受詩經雖時兵革未息

勤夙夜寒暑不少休名所居齋曰惜陰遂博通群書而躬行為務國朝既平暴亂靖宇內修教養之政邑大夫禮為社學師洪武十五年以薦徵詣京師授四川蓬州儒學正旦夕坐講堂為諸生辨析理趣必達乃已諸生所奉一錢以上悉不取曰吾職教受祿矣其學者多成效滿九載天官考其績最奏陞靖江王府紀善歲餘卒於官廿六年二月六日也享年五十有六為人外和內明臨事能果遵用家法不事老佛及祭非類里有病疫

衆引避莫或過問者獨往扶持供餽之卒亦無恙善知
人凡其所許與後率有立配李氏元柳城縣尹尚文之
子涉知書孝敬清儉後十年卒子男三著楷蓬著萬載
縣儒學訓導楷即宜範女二王誠思周如神其婿也孫
男八宜範在京師主余家塾三年聆其言察其行皆君
子也今考知紀善平生如此蓋知其有所本於家矣為
表之以示法其後固仁者之事也

東里續集卷三十

欽定四庫全書

東里續集卷三十一

明 楊士奇 撰

墓表

贈武畧將軍直隸大河衛千戶劉君墓表

劉氏其先家潤州宋咸淳中諱與耕者知吉州後以兵從文丞相空坑之戰死焉其子信叔嘗隨父軍中父歿不復出仕家吉水之環洲隱居行義終其身生均和以孝友惇厚稱於族里生用文泊素自持於是劉氏不仕

三世矣公用文子也諱忠字存信為人端重有信義而器度豁達至正癸巳薄游淮泗間又明年知天命在我太祖皇帝遂奮身以從屬大將軍戰番易征姑蘇平山東入元都皆在行而殺一非罪行一非義未嘗有焉洪武癸丑以功授忠武校尉直隸大河衛所鎮撫天下既大定無所事征伐而公未嘗以安佚自便遇勞役事輒請行雖老敬慎不倦年八十卒洪武辛未三月十一日也葬山陽鉢池山之陽無子以弟克寬之子敏襲其職

後十年陞大河衛千戶贈公武畧將軍大河衛千戶公之配周氏封太宜人後八年周亦卒永樂廿二年敏老疾以其子靖襲職而致事歸推念勲爵所自實肇於公具事行謁余表墓余考公之高祖盡忠所事無忝於為臣而曾祖祖父皆脩德養晦以待其後人而始發於公觀公始終於處物之仁行己之義可謂兼盡而不遺矣故併推其所從來者書之使傳焉

贈翰林侍講承德郎陳彥和墓表

余觀古史記敘述施德行惠長者之事未嘗不嘅焉想見其人而又竊歎夫遇之之難也蓋慷慨激烈急人之急如饑渴於飲食視棄千金如擲寸莛去之而不顧者固不可易得而求夫達於義利之重輕隨其力所至從容行之而不以為名者蓋亦寡見也其非以為名則或有所激或力於初不能無變於其終者亦惡足取哉如吾里陳彥和甫其君子之有取者歟舉其一二吾所知者里有售居地者意屬彥和甫而欲得地者十數人爭

致其直售者固願予彦和甫曰是長者不吾欺也而十數人者交為危言懼售者彦和甫曰奈何以我故而令人相讐虐哉乃計地之直出貲各予爭者而倍其直予售者而受地焉嘗以穀千四百石貸人久不能償彦和甫改書其券為九百石曰五百石以為贈而九百石徐徐豐歲酬我也及彦和甫病革語諸子曰人非志於負我顧其力不逮耳我死爾併以九百石予之卒皆不取此其心豈以為名與有所激乎至其歿執其志不變非

誠於中歟彥和甫自少事父母孝謹雖兵戈艱窘之際
無間蚤喪父彥和甫卒時其母尚在哭之慟曰奈何以
八十之年而失孝子哭不已歲餘亦卒彥和甫居鄉恂
恂和易無迂於物豈非善人者歟其諱某其卒以洪武
己巳九月二十三日享年四十陳氏之先居温州平陽
元初有仕於吉者留家廬陵再世徙泰和至彥和甫四
世矣祖元壽父觀定母劉其配曾氏有孝睦慈惠之行
繼胡氏子男三德遜德達循德達早卒女二蕭玄安高

仰其壻也孫男四璫璫玦女五彦和甫之葬于邑城
之北也與曾氏合墓方循父喪時生十歲永樂十三年
廷試進士第一授翰林修撰後陞侍講洪熙元年朝廷
推恩其父母贈彦和翰林侍講承德郎曾氏胡氏皆安
人世稱為善有後觀於彦和甫之應可以信矣余故表
諸其墓為勸

贈承德郎左春坊左中允張君墓表

刑部主事張宗璉改左春坊左中允之明年賜誥命贈

父彥忱承德郎左春坊左中允是歲宗璉陞大理寺右
寺丞請於朝歸展先墓將行詣余言曰不肖孤之獲以
士進叨祿于朝皆先父母之積之遺今幸蒙榮恩及父
母先母嘗辱銘葬惠光幽壤矣惟先父之墓辭執事重
辱惠之諸孤之願也余竊私念吾鄉先輩君子蓋有不
銘一家兩人者矣然吾史官也古之良史有為一家父
子兄弟繼繼而書者矣顧其行應書而書之用表善垂
勸吾又奚辭按狀張氏系出貝之清河唐末諱融者為

吉州刺史家于官其孫渥徙吉水居文昌鄉之西團里
詩書科第代有繼者至心禹慷慨負氣節元末所在盜
賊充斥心禹奮起舉義兵從討賊戰死其子允昌君之
大父父也母吳氏君諱德棐字彥忱自幼不凡七歲讀
書強記九歲下筆屬辭屈其同輩間聞先生長者道論
古豪傑奇偉事喜色勃勃動眉目家故饒貲羣盜謀劫
之時年十二言於父曰盜利吾財吾散財以振貧且潛
奪盜謀一舉兩得也父喜曰真吾子也從之事父母孝

祖姑老且貧迎歸終養之如母教育孤甥如子處宗姻戚疏無間言族人有闔門病疫素厚者皆引避君躬具湯粥日三四往視雖夜不懈衆尼之曰顧在我當行行之何惑鬼神哉且道傍之木能庇而人不能耶治家訓子嚴而有法與鄉人處怡然至論事是是非非不少借嘗有薦其才者以親老不果出而自號希樵子然負志卓犖居恒自念跼蹐鄉里未嘗得行四方縱觀大川喬岳而接交當時之賢俊又竊痛其大父以布衣死節義

而憤當時之高位厚祿背國賣降以苟全者聞道其姓名戟手詬罵不已每酒酣輒歌諸葛孔明出師表反覆詠嘆已而悵然若自失者喜春秋左氏傳而諸史所記上下二千年理亂興敗之故皆博覽默識廣筵衆賓談笑賦咏援筆立就嘗曰吾不能俛首效諸公作秋蟲悲也蓋年三十有六而卒將卒顧其妻曰善養吾母又指其子謂曰善訓之吾平生行可無愧造物者有報其或在是言訖而卒洪武乙丑八月二十也娶蕭氏贈安人

子男三長宗璉永樂甲申進士翰林庶吉士三遷至大理丞次宗珩宗瓚女二長適錢次適朱孫男六穎頻顯頌頊領曾孫男一睦觀君志行與才使用之宜有不苟然者惜乎年未及仕而棲遲以歿歿時宗璉生九年耳後廿年而駸駸顯揚光大造物者於善人不爽其應如此哉故撮其所可書者以表諸墓

趙孝子墓表

宛平縣丞毗陵宋懋為余言其鄉趙孝子之行求表其

墓懋之言曰孝子諱鉉字文鼎宋宗室簽判良發之七世孫家暨陽數世矣祖彥珪父思誠元季寇盜四起有朱定二者以衆剽掠邑中時郡總帥察彥珪父子才志足有為者檄之捕盜彥珪亦以自任既剽盜鋒而羣盜合勢襲彥珪併其子皆遇害盜意猶未厭將盡殺其家人時文鼎甫六歲母吳負之走姑蘇依姑氏夏節婦盜蹤跡追至蘇又走武林匿姻家方氏居無幾武林胥為盜區文鼎遂與母相失而困苦子子無依有識而憐之

者內之而走書報夏氏夏氏挈之歸教育十年我國家
芟刈羣克弘靖宇內文鼎亦稍長遂還鄉里即先廬故
趾辛勤除荒剪翦作居室以庇然念不見母恒晝夜悲
苦寢食弗遑寧又明年告其祖禰辭訣其家人往求不
得母不生還擔簦裹糧徧歷吳越之境三年不得益苦
不自勝一日邂逅商人於會稽逆旅言狀徑走鄞縣得
焉母子相見如更生遂迎以歸恭致孝養歷十有二年
母歿哀毀動人郡人翰林侍讀學士王達為之贊辭宣

德初元郡通判李學上其事監察御史賴巽奉命覈之
信詔旌其門復其家文鼎卒於某年月日享年若干娶
某氏子男幾某孫幾嗚呼民之於善欲苟有誠焉無弗
得者宋朱康叔生數歲違其母母子不相聞者五十年
康叔行四方求之弗置飲食罕御酒肉言及輒流涕遂
與家人辭訣曰不見母吾不反竟得之同州其事與文
鼎相類蓋皆積誠以得之也夫孝百行之首也其致誠
如此他行可類見矣康叔事王介甫蘇子容子瞻諸公

文與詩道譽之非一則於今表文鼎之墓庸可少哉庸可少哉

鄧伯修墓表

國家置風憲所以糾慝繩違肅清政紀而弼成治功任得其人則公道明而為善者舒不善者斂任非其人則私意騁為善者鬱而不善者肆風憲所係豈細故哉皇上嗣大寶之初璽書數下戒飭憲臣而振起之時中執憲者久於其位怠心既萌欲心不復自制由是其屬靡

然從風於下矣雖其間挺持卓卓不變者未嘗無人然
既不合於其長則亦不能以信其志焉聖明洞鑒乾剛
奮斷廢斥不肖簡陞賢良於是太康顧公奉命為都御
史周眎所屬蠲其濁揚其清不旬月而耳目紀綱之地
煥然一新凡所遣御史出按郡縣皆能振風裁舉職事
以不忝任使而蘇湖諸郡所理尤繁劇前之巡按者多
尚威治至是御史鄧棨獨用寬平而敬慎廉公吏畏民
懷聲譽日振凡巡按歲滿則代棨將代其吏民豫奏乞

留詔從之無幾祭以父喪歸蓋蘇湖諸郡之人皆有不忍其去之意祭可謂賢矣亦必有所自於其家乎祭介翰林檢討陳嗣初求文表父之墓余前未嘗識祭而嘗聞其賢於顧公矣故不復辭按吏部主事黃振宗所述其父事狀其父諱同字伯脩鄧氏世建昌人以儒醫名家伯脩大父濟違父信可母徐氏伯脩早孤能持身務學事母及兄以孝友稱居鄉有君子長者之行平居儉約澹然無慕乎外獨以教子為要事子既仕歲時書問

尤惓惓於善訓嗟夫此蔡之所由成也歟伯脩生吳元
年丁未二月十二日卒於宣德辛亥十一月廿九日享
年六十有五配鄭氏子男三長即蔡由進士擢廣東道
監察御史次德為伯兄某後次文為仲兄某後女一歸
江士熙孫男四瑞珂珮環伯脩克成其子以克國用固
足表勵於世而朝廷用人之明且決故蔡輩得以彙升
蓋幽違之人未必盡知而余又欲勵蔡之敬事君父而
永終不渝也故因表而具見焉

王素行墓表

士奇有同門友曰王素行氏清素簡約言必依禮行必循義交必擇善葛巾布衣蔬食水飲以教授自適榮祿不作於心塵雜之迹是非譽毀之聲一不相及合於易之履道坦坦詩之溫溫恭人而歿也久矣自予仕於朝每公退思鄉里往還蕭散之樂未嘗不及素行又未嘗不悼惜素行之不可復得也王氏在趙宋時繇金陵徙泰和世業儒至彥仁及其子君聘相繼以科第升君聘

子叔明留夢炎榜進士仕至通州判素行七世祖也曾
祖浩吾邑大儒一時博雅秀俊之士多出其講下祖子
敬贛州路教官考仲隆素行諱天祿二歲喪母陳氏既
長事祖母事父及繼母皆盡孝而篤愛異母弟始終一
心宗婣鄉黨無間言處朋友惇信義平居手不釋卷喜
種鞠軒前常十數本不嗜飲酒每秋芳爛然淪佳茗清
坐相對賦詩寫意悠然物表也蓋年四十有六而卒卒
以永樂二年十月十九日葬某鄉某原配胡氏子男五

游克紹父志漁梁洵沆女三孫男九嗟乎余因素行有感焉素行母海素先生之子先母夫人弟也素行長士奇七十余兩人少皆受學先生時陳氏甥十數人先生及諸舅氏特異視余兩人以為將來庶不忝外家余被召上京師與素行別猶共追念前人期望之意蓋別三年而素行卒今三十年矣余雖獨存豈有絲毫裨益外氏哉游今走六七千里來北京求文表其父墓余於素行不能已於言而於外氏重愧且戚也

袁處士墓表

洪武庚戌余初讀書邑學時詔下初建學邑禮致楊自立羅子理鄧崇志三先生為師嚴教法又舉弟子貢二十餘人皆十五以上其人品不齊也踰年三先生相繼出仕學教弛二十人者次第引去下者淪汙逐末接跡以償其淳良篤厚謹勅者殆半或出或處而袁君克睿獨杜門絕俗養親以自適後七八年克睿之祖延海桑陳先生教其家塾余從受學焉與克睿之弟若子連席

余時年十二三矣克齋數從旁相與追論往事而歎二十人者之死徙多也又二十年余被召來京師時獨存克齋一人又二十年則聞獨克齋歸然無恙也而以德善為邑里所尊搢紳所重每念何時歸故鄉相與重握手論舊慰契闊之懷而無幾其訃至矣為之感悼不已今年其孫和具狀請文表墓余及見袁氏六世且幼學先後與克齋父子同師不得辭袁出唐尚書右丞滋滋少子郎刺吉州因樹後泰和世有詩書纓紱而科目

尤盛於宋其六世祖建寧通判士表及兄士安從子清
伯明相繼登第通判五世至以寧克睿祖也父務敏皆
謹靜和厚恂恂于鄉未嘗一毫非僻之干其念慮母李
氏克睿諱睿事父母至孝元季兵亂奔竄巖谷採拾為
養未嘗匱乏仲父務學卒無子奉祖命為之後克睿事
繼母及所後母敬愛同於所生執親喪過戚處兄弟友
恭隆至性澹泊重義輕利屢推有餘以濟不足族姻閭
巷有競爭質之折服以義晚作貽厥堂延名師以訓子

孫閒居讀書誦詩雖老不厭永樂甲辰四月十七日卒
享年七十有一葬縣北五里之規原配孺人康氏邑名
家履謙之子諱柔定父故饒貲孺人簡儉質素自歸袁
氏承多故之後悉倒奩具佐夫以殖家婦道母道靡不
曲盡後克睿卒之明年五月二十日亦卒享年七十有
三葬千秋鄉珠林之原子男五仲暹仲魯仲彬仲蘆仲
倫魯倫皆先卒女二長嫁劉子穎次許嫁蕭湘孫男六
和正統元年進士穆樾樾稔稔女七曾孫男八女五鳴

呼世之所稱處士者豈獨尚其廉退亦重其行之可以
範俗也若克膺之脩諸躬施於家於鄉者皆從容乎天
理民彝之當然而非流俗之所能及也是宜為表而因
及余交友之情云

徐孟聲甫墓表

翰林編修徐瑔將歸葬其父孟聲甫縗經奉史官張益
所述事狀求表于墓徐氏世家蘇之長洲其曾大父孝
基大父文禎父子明母朱氏孟聲甫本伯父子復伯母

薛氏中子諱震子明無子伯父命為之子洪武中徵富民實京師子明與焉遂以家行父坐累將詣獄孟聲請代詣父止之孟聲跪曰父有急子不能代焉用之竟代詣獄久而遇赦免父歿不食飲者累日而飡粥終喪歲時享祀盡誠致孝所生父母均一厚族姻婚喪必助斂葬無後者十餘喪治其家尊卑內外秩然為人外襟內明言動持重未嘗苟合而和厚恭謙於物無迕人有善喜若已出不善溫辭導之使改於交友重信義儉於自

奉而豐於賓客其學通大義既居京師日躬治徭賦不
遂卒業稍暇於朱子小學書未嘗釋手每語諸子曰此
豈獨教幼學汝曹當終身佩服又語之曰吾之先嘗有
聞人近世雖不仕然積累善行久矣吾後人殆有興者
汝曹宜力學以迓承之孟聲甫少嘗學於鄉先生鄺尚
德時同學者率俊爽矜奮起名譽孟聲甫獨執澹靜鄺
曰諸生雖才華然不若徐生惇實有終後十餘年同學
者出仕率以不檢敗而孟聲甫以晦自全皆如鄺先生

言孟聲甫晚號善菴其臨財務義恒急人之急在京師蘇有洪某者被逮至以白金十鎰及他貨幣寄之曰以此託公惟公用給我朝夕幸得生出拜公德也孟聲甫謹度之給以已貲洪事釋倍其數償之孟聲甫曰患難相卹分內事卒却不受其友吳叔振卒於蘇而家甚窶遣子瑾以鈔三千緡馳往賻之鄉人尹仲申嘗貸錢數萬緡悉費於婚喪不能償請緩償期孟聲甫曰人孰無緩急且子非妄費錢者請遂以贈即取券焚之鄰有人

一業屠一業樵皆有老母貧無以養孟聲甫憐之皆予錢使更業以備養歲歉里少年從乞米既予之及夜踰垣為盜家人覺而執之孟聲甫曰此困於饑餓不得已復予錢而遣之戒家人秘勿言他日從外暮歸邂逅羣盜將劫之一人力救之曰此吾里中長者遂獨送至家蓋向之乞米少年也里計戶出公賦孟聲甫常先衆出有貧者為貸出其厚德槩類此春秋六十有六而卒其卒以正統元年十一月二十八日其配丁氏有婦道先

八年卒今將合葬焉子男四琪先卒次璘次瑄宣德癸丑進士為翰林庶吉士授編脩次瑾女一嫁許琳孫男三嗟夫孟聲甫之脩諸躬施諸人者厚矣雖其平素弗志榮達而有子克遵奉訓教遂升賢科官近侍而孟聲甫享祿養者數年蓋為善自然之應也善有不可為乎哉故表之以示勸

故南野翁陳君墓表

蘇之常熟陳符今年四月二十有五其父從道未

葬以其父客北京時於余有故專人奉御醫盛起東所
述事狀加書幣走數千里介禮部主事衛靖求余表墓
按陳之先居崑山以詩禮聞至子正而家裕生九齡始
家常熟娶錢氏從道之大父父母也從道諱繼善南野
翁其晚歲別號也自幼岐嶷長而務學孝事父母宗戚
鄉黨皆稱之脩德循義日勤弗懈治家謹禮法冠昏喪
祭之儀悉酌古行之家日益裕而樂簡澹為人剛直曠
達明智識篤踐履經史百家皆通究雖老手一卷不斲

釋嚴子孫之教督之於學每誨之治心曰心不正不能
以為仁不仁不可以為人子孫有過必正色飭之不為
姑息常指家之帑廩語子孫曰世之人務積金穀遺後
吾不能效之吾所願汝曹以寬裕積善存心勿徒齷齪
效流俗也名其出內之所曰平軒又為文刻石以識令
後人世守之厚宗族貧者或買田以贍之或作室以居
之於閭里鄰比周窮恤匱咸悉心焉尚賢重士交久而
敬不衰儒者吳文度學行俱高聘教家塾禮之甚厚七

年如一日文度卒喪葬之具悉出陳氏春秋必命子若孫展其墓終翁之世二十餘年不廢又刻其所著文章以傳誠於交處率類此遽於醫宣德中被徵至京師留三歲以老得辭縉紳大夫相知者為詩文贈之既歸諸子恭勤孝養營園池雜植花卉奇樹作二亭其中以奉之翁取陶淵明歸去來辭東皋西疇為之名曰與賓客宴樂超然物外者數年一日顧其子曰吾將歸矣當與親知別遂命舟徧詣故舊既歸十餘日沐浴衣冠而逝

正統四年也享年七十有三元配范先卒繼沈子男二
長即符次續女二張容周鵬其壻也嫁張者亦先卒孫
男二復蒙女四其子若孫皆恂恂謙謹趣學不墮翁之
教將以明年某月日奉葬于塗崧岡橫瀝之西原嗟乎
南野實踐之士孝敬行於家忠厚傳於子惠施於族里
義著於朋友積而樂散富而敦禮人有一能之名稱煒
煒嗟乎南野羣行斯備既壽且康式蕃厥祉表于厥歲
示法來裔

教授郭君墓表

刑部員外郎泰和歐陽湯求余表其外舅郭君彥鉉之墓彥鉉余少壯時莫逆交故不辭郭氏之先見余所教其家續譜彥鉉諱鼎其祖巨卿父慶宜洪武中湖州府經歷母車氏湖州公五子第二彥鉉也幼從父命為伯父慶宏後自幼警敏喜學有立志兄弟皆不及最為湖州公及伯父登州教授敬守所愛侍湖州公宦途服勞奉養克勤夙夜父卒偕弟西治喪斂奉柩歸葬咸盡禮

友於兄弟季弟龍為鍾仲敏贅壻鍾有怨家繫仲敏及龍誣飾其罪詣京師訴彥鉉不忍弟之陷於非辜馳往視之怨家并繫彥鉉行仲敏龍道中為怨家榜擊不勝楚毒既至臬司語不能出口彥鉉代說本末事竟白誣訴者誅死龍歸道病卒彥鉉不勝慟蓋孝友本諸其性云治書經洪武末縣令丞舉克學訓導彥鉉疏通有智識雍容詳雅善說辭上官皆賢之所言悉見聽用九載訓導績最陞安吉縣學教諭安吉士習下泰和遠甚一

力作興九載績又最陞教授順德府學其士習土俗尤
下又一力作興之厯五六年日見成效矣會有詔仕而
老疾者聽致仕彥鉉年已六十有九遂決意去洪熙元
年也歸得疾又十年卒宣德甲寅六月六日也享年七
十有九彥鉉所至士君子敬服之嘗考廣東鄉試藩憲
重其老成人皆曰斯文之表也葬縣北郭坪下之原彥
鉉卒時惟三女在侍長者嫁湯次嫁蕭孟節又次嫁劉
三省初其出妻李負乳兒歸依外家又數年彥鉉娶尹

氏上海教諭子厚先生之女有賢德聞其出妻有子也告於先生求之歸先生躬詣求數數不得自是彥鉉亦宦於遠外李死乳兒長育外氏者名斗玄年益長矣彥鉉後有三子名合懽同庚皆已入小學而卒及歸老方重無後之戚其友彭彥晦求得斗玄以歸之彥鉉尹孺人皆幸喜郭之一家內外老長嘗見李去時事又見斗玄長成而狀貌甚肖父也皆為之感嘆忻悅鄉間朋友喜彥鉉子歸皆載酒入賀曰郭氏福未艾也彥鉉素有

薄田園其子姪私懷覬覦已久一旦聞其出妻之子歸
皆錯愕失意即共詬詈合力排出之時彥鉉已病雖其
心明而言不能出聲莫或禦之尹孺人兄子鐸幼承彥
鉉教育念有報之即言諸其弟姪曰我有田畀斗玄其
父園田聽若等取無所預也其弟姪不肯容斗玄乃復
依外家彥鉉中懷抑鬱竟不起弟虎以其子企為之後
數年湯夫婦復求得斗玄歸捐已田廬畀之而處于其
鄉嗚呼彥鉉田園蓋不及百畝然利之移人不必其豐

而遽致同氣為寇讐可為世道之深慨矣若尹先生及
鐸及湯之忠厚世豈能得什一於千百也吾故并表章
之以示勸戒

徵士朱君墓表

朱氏吉水儒家其先在宋曰肇先六子皆有文學其季
曰斯馨元祐中累舉進士官至刑部侍郎屬四方多事
始居吉之白水子惟幾徙暮膳里其後又徙住岐里族
姓益蕃至徵士十世矣曾大父雲卿大父景春父存芳

皆隱處不仕母李徵士諱淵字子深坤源其別字也生五六歲能成誦古人詩琅琅不輟口侍賓客立凝然終日不懈稍長益喜學從鄉名儒歐陽師尹先生駸駸有造詣聲譽以起洪武中詔郡邑舉賢一時朱氏膺舉者三人從叔憲章以賢良君以明經弟子良以懷才俱至會府憲章及君皆以親老懇辭子良自華亭令後陞刑部員外郎君退日以養親為務授徒里中而親之甘旨恒克及祭祀賓客之外一無所營友兄弟睦族姻善鄉

曲有犯不校有急能周永樂初被徵至以老辭自是優游丘壑以教子為務諭其子曰吾不足效世用汝曹勉之嗜好澹素襟度灑落閒暇朋輩相聚商確古今聯詩酌酒超然物表也永樂十六年六月二十日卒享年七十有二葬里堵水陂之原元配周有淑德繼配皆先卒繼龐子男四伯載璇仲載明亦皆先卒叔載經季載衡女四周彝綱陳元康陳祉陳奇齡其壻也孫男八女六載經舉鄉貢授教官今陞貴池縣學教諭詣余泣拜請

曰先君子將易簀時顧諸孤曰我死必得西昌楊公表墓無所遺憾不肖孤銘諸心不敢忽忘然久而未遂伸其私不孝之罪深矣願先生哀而畀之以成先君子之志嗟乎徵士君子屬我矣且閱進士江奎所狀君之行應表遂為之表

邵仲仁墓表

仲仁諱仁姓邵氏世為姑蘇士族曾祖宏祖明之父瑤皆隱居有行母顧氏仲仁生有令質器宇凝重稍長卓

卓自立嗜文學事親奉養葬祭克致其孝於兄弟相敬
愛於朋友重信義教子有道睦親姻厚鄉里有恩鄉之
人率重之號長者仲仁未嘗自足而益勵不懈嘗名其
居曰樂善鄉人遂以樂善稱之未壯坐累徙滇南雖艱
難旅瑣中凡所以行義不減在鄉時故滇南之人皆重
之如其鄉人焉鄒孟氏所云有恒心者仲仁其人歟年
三十有九卒永樂戊子三月十九日也葬昆明金馬山
之南其仲子璇夙志清淨從長春真人劉淵然學老子

法淵然為易名以正天子書問淵然弟子孰賢舉以正對遂召至京入見命為道錄司右至靈陞右演法住持靈濟宮以正夙夜思惟父母之德善恐遂泯沒無聞介秀才王益夫以吾友翰林編修楊君所述事狀求表其父之墓予受而閱之曰嗟乎其可表也仲仁之為行皆人道之當然亦皆人所可至而世之人能知能行如仲仁鮮矣世之為老釋之徒者率自謂得出世法而回顧其所生漠若塗人者有矣有能惓惓圖永其所生於不

泥如以正之孝加鮮矣故特為之表


朱氏先塋之表

蘇之崇明朱氏諱新字通甫讀書好禮有孝弟之行不別治生業惟勤稼穡蚤作暮息躬督其家人歲穫共公賦外必有餘而施義於其鄉貧乏患難咸賴以濟其施益厚而心恒若不及蓋鄉之善者皆譽其行不善者亦化而改焉治道路惠行者作津梁惠涉者亦皆盡心鄉閭有長者之號某年卒春秋七十有六配葛氏繼唐氏

二子長旭字孟熙次嵩字某孟熙孝友之行如其父為
人恭讓廉靜里俗為變急人之急平居鮮出里門嘗歲
饑邑廩不足賑即躬率耆老踰海詣巡撫侍郎周公郡
守况侯言狀得米二千餘石歸賑民藉以活第嵩蚤卒
遺孤禮樂尚幼撫育如子擇良師友以成其學孟熙某
年卒春秋七十有三配張氏一子思政先卒三孫敏安
奉皆幼嵩居家之行如父兄兄以賦出驛役馬視供具
不備逮兄撈咎之嵩泣涕如雨即解衣請代咎觀者義

之為人喜隱惡揚善年三十有一卒配陸氏二子禮樂
禮自太學生以能書簡入翰林職繕寫擢戶科給事中
改中書舍人今為尚寶司丞洪熙中制贈其父徵士郎
中書舍人母孺人朱氏自通甫及配葬崇明之新城南
原其二子及婦皆以次祔禮今以省丘墓歸求予表其
先塋禮從余在翰林數年質直和易臨事不苟屢改官
皆在近侍執守如一蓋余雅重之蓋嘗觀之世之都爵
位者及其身既沒其子孫或流而猥瑣汙下甚者庸衆

人莫之與齒山林幽逸之士子若孫有起而光顯聞達
為世所重者何哉豈其都爵位者素無以及人又或不
能自善其身固不足以裕後幽逸之士能處善循理又
隨力所至而人利賴之此其所為有後蓋非偶然之故
也若崇明朱氏之先以是已故為之表



東里續集卷三十一